

適園叢書

張宗祥



通國書舍



張氏藏

五代史記補考卷第十四

禮樂考第十七

親拜郊

梁太祖開平二年十一月自東京赴洛都行郊天禮自石橋

備儀仗至郊壇

文獻通考

三年正月以河南尹張宗奭爲南郊大禮使

故事皆以宰相爲之今以河南

尹充非常制也同上

周太祖廣順三年九月太常禮院奏準敕定郊廟制度洛陽

郊壇在城南七里丙己之地園丘四成各高八尺一寸下廣

二十丈再成廣十五丈三成廣十丈四成廣五丈十有二陛

每節十二等燎壇在泰壇之丙地方一丈高一丈二尺沿上

南出戶方六尺請下所司修奉從之

時周太祖將拜南郊故修奉之

會要

梁太祖南郊二

開平三年正月二十四日其年十一月二日

後唐莊宗南郊一

同光二年二月一日

明宗南郊一

長興元年二月二十一日

周太祖南郊一

顯德元年正月一日

同上

五代以來宰相爲大禮使太常卿爲禮儀使御史中丞爲

儀仗使兵部尙書爲鹵簿使京府尹爲橋道頓遞使

同上

案梁太祖始建都於汴然郊壇則在洛都開平二年十一

月南郊帝自東京至洛都行禮自石橋備儀仗至郊壇三

年正月以河南尹張宗奭爲南郊大禮使

後唐莊宗同光二年帝祀南郊初梁均王將郊祀於洛陽

聞楊劉陷而止其儀物具在至是張全義請上亟幸洛陽

謁廟畢卽祀南郊從之然則梁唐行郊祀皆在洛陽

同上

郊祀雜錄

梁開平二年十一月南郊禮儀使奏今檢詳禮文皇帝赴南郊服通天冠絳紗袍登玉輅法駕鹵簿自清遊逐已下諸衛將軍平巾幘緋兩擋大口袴錦膝蛇銀隱起金帶刀弓箭似飛執旗人引駕三衛並武弁緋兩擋大口袴供奉官並武弁服色各一人步從餘文武官及導駕士絳衣平巾幘餘並戎服準式近侍導駕官自三引車從本縣令州府御史大夫卽朝服各乘輅車前導其引駕官員不總備車輅自中書令侍中已下則公殿內諸司使並常服內人服色禮文不載其年自東京赴洛都行郊天禮自石橋備前件儀仗至郊壇

會要

後唐同光二年正月禮儀使奏南郊朝饗太廟合祭天地于
園丘舊制以親王充亞獻行事乃以皇子繼岌爲亞獻皇弟
存紀爲終獻天成四年九月太常禮院奏來年二月十八日
致齋于明堂準舊儀皇帝服通天冠絳紗袍文武五品已上
著袴襪陪臣近例祇著朝服從之

同上

詔公卿以下議定郊祀門下侍郎平章事居詠中書侍郎平
章事建勳等議曰孔子云郊祀后稷以配天宗祀文王於明
堂以配上帝此萬世不易之法也昔長孫無忌請祀高祖於
園丘以配昊天上帝祀太宗於明堂以配上帝蓋得之矣今
國家嗣興唐祚追尊孝德而以神堯爲肇祀之祖宜以神堯
配天於園丘以孝德配上帝於明堂禮也其服物制度古有

常儀一切偽飾願皆罷去奏可司徒齊王請依春秋郊以四
月上辛常夢錫駿曰案禮天子之郊以冬至不卜日魯侯之
郊以仲春卜上辛今之四月非郊之時齊王固爭遂用夏四
月夏讀爲夏商之夏議者多哂之詔曰禮莫重於享帝孝莫
大於隆親事實重大承以親眇可謂無其德而用其事祇加
畏焉噫嘻爾公爾侯各揚厥職不供迺事國有常典夏四月
上辛始郊祀於圜丘大赦境內馬令南唐書

親饗廟

梁太祖二饗廟

開平三年正月二十二日其年十月三十日

後唐莊宗一饗廟

同光

二年正月二十九日

明宗一饗廟

長興元年二月十九日

周太祖一饗廟

廣順三年十二月二十九日

會要

九日

五仁學考卷一四
三
廟儀

梁開平元年夏四月太祖初受禪乃立四廟于西京從近古之制也

同上

後唐同光二年六月十日太常禮院奏國家興建之初已于北都置廟今尅復天下遷都洛陽卻復本朝宗廟案禮無二廟之文其北都宗廟請廢下尙書王正言等奏議曰伏以宮室之制宗廟爲先今卜洛居尊開基御宇事當師古神必依人北都先置宗廟不宜並設況每年朝享禮有常規時日既同神何所據竊聞古道例亦從權于神主已修迎之藏于夾室若廟宇已從虛之以爲常制昔齊桓公之廟二主禮無明文古者師行亦無遷于廟主若天后之崇輦洛禮爲非宜漢

皇之戀豐滕事無所法況本朝故事禮院具明洛邑舊都高
丘正位豈宜遠宮闕之居建祖宗之廟事非可久理在從長
其北都宗廟請準太常禮院申奏宜從廢停從之

同上

天成元年中書舍人馬縞奏曰伏見漢晉已來以諸侯王宗
室承襲帝統除七廟之外皆別追尊私親漢光武皇帝立先
四代于南陽其後桓帝已下亦皆上考前修追崇先代乞依
兩漢故事別立親廟詔下尙書省集百官定議禮部尙書蕭
頊等議曰伏見方冊所載聖槩斯存將達蘋藻之誠宜親棗
稅之制臣等集議其追尊位號及建廟都乞依馬縞所議

同上

二年中書門下又奏伏以兩漢以諸侯王入繼帝統則必易
名上諡廣孝稱皇載于諸侯故事孝德皇孝仁皇孝元皇是

也伏乞聖慈俯從人願詳取皇而薦號兼上諡以尊名改置園陵仍增兵衛遂詔太常禮院定其儀制太常博士王丕等引漢桓帝入嗣尊其祖河間孝王曰孝穆皇帝蠡吾侯曰孝崇皇帝爲例請付太常卿定諡刑部侍郎權判太常卿馬縉復議曰依準兩漢故事以諸侯王宗室入承帝統亦必追尊父祖修樹園陵西漢宣帝東漢光武孝享之道故事具存自安帝入嗣遂有皇太后今別崇諡法追曰某皇所謂孝德孝穆之類是也前代惟孫皓自烏程侯繼嗣追父和爲文皇帝事出非常不堪從順今據禮院狀漢安帝已下若據本紀又不見有帝字伏以諡法德象天地曰帝伏緣禮院以曾奏聞難將兩漢故事便述尊名請詔百官集同右僕射李琪等議

曰伏觀歷代已來宗廟成制同襲無異沿革或殊馬縞所奏
誠有經據乞下制命令馬縞據依典冊以還尊名乃下詔曰
朕聞開國承家得以制禮作樂故三皇不相襲五帝不相沿
隨代創制于理無爽矧或情關宗祖事係蒸嘗且追諡追尊
稱皇與帝既有減增之字合陳褒貶之辭大約二名俱爲尊
稱若三皇之代不可加帝五帝之代不可言皇爰自秦朝便
兼其號至若元皇帝事隔千祀宗追一源猶顯冊于鴻名
豈須尊于漢典況朕居九五之位爲億兆之尊不可總二名
于眇躬惜一字于先代苟隨執議何表孝誠可委宰臣與百
官詳定集兩班于中書各陳所見唯李琪等請于祖稱二室
先加帝字宰臣合眾議奏曰恭以朝廷之重宗廟爲先事係

承祧義符致母且聖朝追尊之日卽引漢代舊儀在漢氏封
崇之時復依何代故事理關凝滯未曰聖謀道合變通方爲
民則且王者功成治定制理作樂正朔服色尙有改更尊祖
奉先何妨沿革若應州必立別廟卽地遠上都今據開元中
追尊皋陶爲德明皇帝涼武昭王爲興聖皇帝皆立廟于京
都臣等商量所議追尊四廟望依御札若並加皇帝之號兼
請於洛京立廟敕宜于應州舊宅立廟餘依所奏其年八月
太常禮院奏莊宗神主以此月十日祔廟七室之內合有祧
遷中書門下奏議議祧懿祖一室後下百僚集議禮部尙書
蕭頃等奏入從中書所議從之

同上

私親廟

後唐明宗天成二年中書門下奏兩漢以諸侯王入繼帝統則必易名上諡廣孝稱皇改置園陵仍增兵衛等事遂詔下太常禮院集議請追尊四廟並加帝皇之號兼請於洛京立廟敕宜於應州舊宅立廟餘依所奏

文獻通考

案莊宗以沙陀爲唐之嗣明宗又以代北狄裔爲莊宗之嗣故後唐之所謂七廟者以沙陀之獻祖國昌太祖克莊宗用而存而上繼唐之高祖太宗懿宗昭宗而此所謂四廟者又

明宗代北之高曾祖父也

同上

應順元年正月中書門下奏太常以大行山陵畢祔廟今太廟見享七室高祖太宗懿宗昭宗獻祖太祖莊宗大行升祔禮合祧遷獻祖請下尙書省集議太子太傅盧質等議曰臣

等以親盡從祧垂于舊典疑事無質素有明文頃莊宗皇帝再造寰區復隆宗廟追三祖于先代復四室于本朝式遇祧遷旋成沿革及莊宗升祔以懿祖從祧蓋以嗣立之君所以先遷其室光武滅新之後始有追尊之儀比祗在于南陽元不歸于太廟引事且疏于故實臣等須稟于親規將來升祧先廟次合祧遷獻祖既叶隨時之義又符變禮之文從之時議者以懿祖賜姓于懿宗以支庶繫大宗例宜以懿祖爲始祖次昭宗可也不必祖神堯而宗太宗若依漢光武則宜于代州立獻祖而下親廟其唐廟依舊禮行之可也而議謚者忘咸通之懿宗又稱懿祖父子俱懿于理可乎將朱邪三世與唐室四廟連敘昭穆非禮也議祧者不知受氏于唐懿宗

而祧之今又及獻祖以禮始祧昭宗次祧獻祖可也而懿祖如唐景皇帝豈可祧乎

會要

七年七月太常禮院奏國朝見饗四廟靖祖肅祖睿祖憲祖今大行皇帝將行升祔案會要唐武德元年立四廟于長安至貞觀九年高祖神堯皇帝崩命有司詳議廟制議者以高祖神主併舊四室祔廟今先皇帝神主請同唐高祖升祔從之

同上

漢天福十二年閏七月太常博士段頤奏議曰伏以宗廟之制歷代爲難須案禮經旁求故實又緣禮貴隨時損益不定今參詳歷代故事請立高曾祖祢四廟更上追遠祖光武皇帝爲始祖百代不遷之廟居東向之位共爲五廟庶符往例

又合禮經詔尙書省集議吏部尙書竇正固等議曰案禮記王制云天子七廟諸侯五廟大夫三廟疏云周制之七廟者太祖及文王武王之祧與親廟太祖后稷也又云天子七廟皆據周也有其人則七無其人則五至于光武中興及歷代多立六廟或四廟蓋建國之始未盈七廟數又案郊祀錄王肅云德厚者流澤廣天子可以事六代之義也今欲請立高祖已下四親廟又云聖王祖有功宗有德卽于四廟之外祖功宗德不拘定數今除四廟親外更請上追高皇帝光武皇帝共六廟從之

同上

周廣順元年正月中書門下奏太常禮院議曰合立太廟室數若守文繼體則魏晉有七廟之文若創業開基則隋唐有

四廟之議聖朝體通禮追諡四廟伏恐所議未同請下百官
集議太子太傅和凝等議曰恭以肇啟洪圖惟新黃屋左宗
廟右社稷率由舊章崇祖禰辯尊卑載于前史雖質文互變
義取各殊或觀損益之規咸繫興隆之始陛下體元立極本
義祖仁開變家成國之基遵奉先思孝之道據禮官議立四
親廟允叶前文從之

同上

平定廟享雜錄

唐清泰元年四月羣臣議明宗諡于南郊太常卿盧文紀請
諡曰聖智仁德欽孝皇帝廟號明宗宰臣馮道議曰案諡法
發號出令能悅民曰和克定禍亂曰武大行皇帝道契天和
功定神武請改聖哲仁德四字爲聖德和武